

01/02/2001

Laporan Asiaweek disifatkan pembohongan

KUALA LUMPUR, Rabu - Umno menegaskan Ahli Majlis Tertinggi (MT), Datuk Shahrir Abdul Samad, tidak pernah mengeluarkan atau membuat kenyataan seperti yang dilaporkan oleh majalah Asiaweek keluaran 26 Januari lalu.

Sehubungan itu, parti utama Barisan Nasional (BN) itu menghantar surat bantahan rasmi kepada majalah berkenaan hari ini sambil menyifatkan laporan artikel bertajuk Mahathir's Dilemma (Dilema Mahathir) sebagai satu pembohongan besar dan sengaja dilakukan untuk melaga-laga pemimpin Umno.

Surat bantahan yang ditandatangani Setiausaha Eksekutif Umno, Senator Datuk Tengku Adnan Tengku Mansor, menegaskan: "Shahrir tidak pernah mengeluarkan atau membuat sebarang kenyataan kepada Perdana Menteri dalam mesyuarat yang disebut dalam artikel anda. Ini adalah satu pembohongan yang terang-terangan dan laporan tidak adil dari pihak anda."

Asiaweek keluaran 26 Januari lalu melalui artikel tulisan Peter Cordingley itu antara lain menyebut:

"Tetapi kali ini Perdana Menteri menjadi penerima akhir. Senario adalah mesyuarat majlis tertinggi parti pemerintah pada awal Disember lalu. Ketika semua pegawai kanan memerhati dalam keadaan terpegun, seorang ahli veteran, Shahrir Abdul Samad, memberitahu Perdana Menteri bahawa beliau adalah punca kerajaan mengalami aib kekalahan pilihan raya kecil hanya beberapa hari sebelum itu."

Melalui surat itu, Tengku Adnan turut mempersoalkan tindakan melampau Asiaweek yang ternyata bukan sahaja mencetus isu berikutan kekalahan BN di pilihan raya kecil Dewan Undangan Negeri Lunas, November lalu, bahkan usaha jelas untuk melaga-lagakan sesama pemimpin Umno.

"Saya juga keliru dengan kewibawaan sumber anda walaupun anda menyebut sumber berkenaan sebagai 'ahli parti' yang hadir di mesyuarat itu. Ini jelas menunjukkan usaha memalsukan fakta di pihak anda," katanya.

Justeru, beliau mendesak majalah berkenaan supaya lebih bertanggungjawab dan menyiasat kesahihan fakta artikel sebelum menyiarkannya.

Laporan keterlaluan seperti itu katanya, hanya menjejaskan kewibawaan Asiaweek sebagai majalah disegani masyarakat antarabangsa.

"Umno berharap Asiaweek akan lebih bertanggungjawab dalam menyiarkan laporan membabitkan isu Umno pada masa depan. Sekurang-kurangnya cuba bersikap objektif dan siasat semula fakta sebelum menerbit artikel atau laporan," katanya.

(END)